



Bazuar në nenin 35, paragrafi 1, nënparagrafi 1.1 të Ligjit nr. 03/L-209 për Bankën Qendrore të Republikës së Kosovës (Gazeta Zyrtare e Republikës së Kosovës, nr. 77/16 gusht 2010) nenin 4 paragrafi 3, dhe nenin 75 paragrafi 5 të Ligjit nr. 05/L-045 për Sigurimet (Gazeta Zyrtare e Republikës së Kosovës nr.38/24 dhjetor 2015), Bordi i Bankës Qendrore të Republikës së Kosovës në mbledhjen e mbajtur më 31 mars 2016 miratoi

RREGULLORE PËR KËRKESAT E MBAJTJES SË RREZIKUT DHE MBULIMIT PËRMES RISIGURIMIT

Neni 1

Qëllimi dhe fushëveprimi

1. Qëllimi i kësaj rregulloreje është caktimi i kërkesave që siguruesit duhet të mbajnë dhe përcjellin në lidhje me obligimet e tyre për të siguruar te një risigurues, rrezikun e siguruar, që tejkalon kufijtë maksimal të mbulimit siç është përcaktuar nga kjo rregullore.
2. Kjo rregullore aplikohet për të gjithë siguruesit dhe degët e sigurueseve të jashtëm të licencuar nga BQK-ja për të vepruar në Republikën e Kosovës.

Neni 2

Përkufizimet

1. Të gjitha termet e përdorura në këtë rregullore kanë kuptim të njëjtë me termet e përkufizuara në nenin 3 të Ligjit nr. 05/L-45 për sigurimet (me tutje Ligji për sigurimet), ose sipas përkufizimeve në vijim, për qëllimin e kësaj rregulloreje:
 - a) “*Viti financiar*” nënkupton periudhën dymbëdhjetë mujore, e cila fillon më 1 janar dhe përfundon më 31 dhjetor. Për një sigurues të ri të licencuar, viti fillestar financiar fillon në datën e licencimit të tyre dhe përfundon më 31 dhjetor të vitit kur ka marrë licencën e parë. Pas kësaj, viti financiar do të jetë nga 1 janari deri më 31 dhjetor të çdo viti kalendarik.
 - b) “*Rasti i siguruar*” nënkupton një rast i cili nëse ndodhë mund të shkaktojë sigurimin e të drejtës për të marrë zhdëmtim nga sigurimi;
 - c) “*Cedim*” nënkupton kalimin e një pjese të rrezikut të siguruar nga një sigurues te një risigurues;
 - d) “*Risigurim*” nënkupton cedimin e rreziqeve të caktuara nga një sigurues te një risigurues;
 - e) “*Risigurues*” nënkupton personin juridik i licencuar për të ushtruar veprimtari risigurimi sipas përcaktimeve të Ligjit për Sigurimet;
 - f) “*Mbajtje e rrezikut*” nënkupton shumën apo pjesën e shumës së siguruar nga siguruesi, e cila nuk është e risiguar (nuk është ceduar te risiguruesi);

g) “*Shuma e siguruar*” nënkupton vlerën, për të cilën janë pajtuar siguruesi dhe i siguruari apo që mund të jetë përcaktuar ndryshe me legjislacionin në fuqi dhe që përcakton kufirin e përgjegjësisë së siguruesit kundrejt të siguarit;

2. Për qëllime të kësaj rregulloreje me termin sigurues kuptohet edhe dega e siguruesit të jashtëm.

Neni 3

Mbajta e rrezikut për siguruesit e licencuar

1. Siguruesit e licencuar nuk duhet të mbajnë rrezik më të lartë se 10% e kapitalit të tyre themeltar, për një rast të siguruar.
2. Siguruesit mund t’i risigurojnë (cedojnë) përgjegjësitë e kontraktuara me të siguarit, te një risigurues vendas ose i huaj.
3. Secili sigurues duhet të monitorojë ekspozimin ndaj akumulimit të rreziqeve, si dhe ekspozimin ndaj rasteve të katastrofave dhe në raport me këtë, të mbajë mbulesë risiguruese adekuate.
4. Kalkulimet për kufizimet sipas këtij neni, do të bazohen në pasqyrat financiare vjetore të audituara dhe të dorëzuara në BQK.
5. BQK-ja mund të kërkojë risigurim tjetër ose shtesë nëse përcakton se kjo do të mbrojë interesat e policëmbajtësve.

Neni 4

Blerja e mbulimit nga risigurimi

1. Të gjithë siguruesit e licencuar duhet të blejnë mbulimin e nevojshëm të risigurimit për dallimin në mes të rrezikut që është marrë në sigurim dhe nivelit maksimal të mbajtjes së rrezikut.
2. Mbulimi i risigurimit duhet të jetë aktiv jo më vonë se me 1 janar për vitin e ardhshëm financiar dhe do të përmbledhet e do të dorëzohet në planin përmbledhës të risigurimit, si dhe do të azhurnohet gjatë vitit kalendarik nëse pëson ndryshime.
3. Nuk lejohet që rreziku i marrë në sigurim të bëhet pa mbulim të plotë të risigurimit. Në rast se zbulohet se rreziku i marrë në sigurim është bërë pa mbulim të plotë të risigurimit, atëherë siguruesi do t’i nënshtrohet masave ndëshkimore sipas nenit 6 të kësaj rregulloreje.
4. Siguruesi obligohet që brenda afatit prej dhjetë ditëve nga dita e zbulimit të mos posedimit të mbulimit të plotë ri sigurues, të blejë mbulimin e plotë të ri sigurimit për rrezikun e marrë në sigurim.
5. Për kontratat afatgjata të risigurimit, siguruesit duhet të blejnë mbulimin e nevojshëm të risigurimit nga risiguruesit, të cilët duhet të kenë klasifikim jo më të dobët se vlerësimi BBB+ nga Standard & Poor’s ose ekuivalentët e saj nga Fitch dhe Moody’s, apo ekuivalentet e saj nga agresionet e tjera të klasifikimit (rejtingut), të pranueshme për BQK-në.

6. Për kontratat afatshkurta të risigurimit, siguruesit duhet të blejnë mbulimin e nevojshëm të risigurimit nga risiguruesit të cilët duhet të kenë klasifikim jo më të dobët se vlerësimi A-3 nga Standard & Poor's ose ekuivalentet e saj nga Fitch dhe Moody's, apo ekuivalentet e saj nga agjencitë e tjera të klasifikimit të pranueshme për BQK-në.

Neni 5

Dorëzimi i programit të risigurimit

1. Siguruesit duhet të finalizojnë kalkulimet e tyre për kufij të mbajtjes së rrezikut dhe të përgatitin programin e risigurimit të bazuar në biznes-planin e tyre për vitin e ardhshëm kalendarik dhe do ta dorëzojë atë për shqyrtim në BQK, jo më vonë se 30 ditë kalendarike para mbylljes së vitit financiar.
2. Programi i risigurimit para se të dorëzohet në BQK, duhet të aprovohet nga Bordi i drejtorëve të Siguruesit.
3. Siguruesit duhet të disenjojë dhe implementojë programin e tyre të risigurimit, varësisht nga struktura e portofolios së tyre të sigurimit, si dhe të përcaktojë dhe konfirmojë që programi dhe marrëveshjet e tyre të risigurimit ofrojnë mbulim të mjaftueshëm për rreziqet specifike dhe agregate.
4. Programi i risigurimit duhet të përmbajë së paku zërat si në vijim:
 - a) kalkulimin e agregatit total të rreziqeve për secilën klasë të mbajtur të sigurimeve;
 - b) tabelën e mbulimit maksimal, të krijuar në bazë të kalkulimeve të referuara në nënparagrafin a) të këtij paragrafi;
 - c) procedurat, bazat dhe kriteret për përcaktimin e probabilitetit më të lartë të humbjeve që mund të rezultojnë nga ndodhja e një rasti të vetëm, nga një rrezik i caktuar i pranuar;
 - d) emrat e risiguruesve dhe përqindjet e tyre të pjesëmarrjes në pranimin e rreziqeve; dhe
 - e) termet specifike të kontratave.
5. BQK-ja pas shqyrtimit të programit të risigurimit, mund ta refuzoj atë nëse vlerëson se i njëjti nuk përmbush kriteret e caktuara me ligjin për sigurimet dhe këtë rregullore.
6. Në rastet nga paragrafi 2 i këtij neni, BQK-ja do të kërkojë nga siguruesi t'i bëjë përmirësimet e nevojshme në mënyrë, që programi i risigurimit të jetë në pajtim me kërkesat ligjore dhe rregullative.
7. Kalkulim i mbajtjes së rrezikut do të azhurnohet çdo tre muaj dhe do të dorëzohet në BQK, duke u bazuar në shënimet e fundit, brenda 30 ditëve nga përfundimi i tremujorit.
8. Bordi i drejtorëve dhe kryeshefi ekzekutiv i siguruesit do të jenë drejtpërdrejt përgjegjës për përmbushjen e kërkesave të kësaj rregulloreje.
9. BQK-ja mund të nxjerrë udhëzime shtesë për zbatimin e kësaj rregulloreje.

Neni 6

Zbatimi, masat përmirësuese dhe dënimet civile

Shkelja e dispozitave të kësaj rregulloreje, do të jetë subjekt i masave administrative dhe dënimeve me gjobë siç përcaktohet në Ligjin nr. 03/L-209 për Bankën Qendrore dhe Ligjin nr. 05/L-045 për sigurimet.

Neni 7

Shfuqizimi

Me hyrjen në fuqi të kësaj rregulloreje shfuqizohen të gjitha dispozitat e rregulloreve, rregullave dhe udhëzimeve që rregullojnë çështjet për risigurimin.

Neni 8

Hyrja në fuqi

Kjo rregullore hyn në fuqi më 1 prill 2016.

Kryetari i Bordit të Bankës Qendrore të Republikës së Kosovës

Prof. Dr. Bedri Peci